



Broj/Број: 4/1-50-1-9-30/06
Sarajevo/Сарајево, 16.2.2006. godine

ZAPISNIK

30. sjednice Zajedničke komisije Parlamentarne skupštine BiH za odbranbeni i sigurnosnu politiku i nadzor nad radom odbrambenih i sigurnosnih struktura na nivou BiH

Sjednica je održana 26.2. 2006., u vremenu od 10,00 do 12,30 sati.

Sjednici su prisustvovali članovi Zajedničke komisije:

Boško Šiljegović, Vinko Radovanović, Osman Brka, Adem Huskić, Momčilo Novaković, Branko Zrno, Halid Genjac i Mehmed Žilić.

Sjednici nisu prisustvovali: Anto Spajić, Šefik Džaferović, Vinko Zorić i Mirko Blagojević.

Sjednici su prisustvovali i gosti: Nikola Radovanović, ministar odbrane BiH; Slavko Marin, savjetnik predsjedavajućeg Predsjedništva BiH; Ismajil Sarić, Ankica Tomić, Vesko Drljača iz Ministarstva sigurnosti BiH; Christian Haupt i Rodolphe Oberle iz OSCE-a; Dragica Hinić, sekretar Zajedničke komisije; Željko Grubešić, ekspert za vojna i sigurnosna pitanja; Albina Ibrahimagić, volonter u PSBiH, Danijela Krišto, stažista iz NDI.

Sjednici Zajedničke komisije za odbranbeni i sigurnosnu politiku i nadzor nad radom odbrambenih i sigurnosnih struktura na nivou BiH predsjedavao je Boško Šiljegović.

Za sjednicu je predložen

DNEVNI RED

1. Izbor drugog zamjenika predsjedavajućeg Zajedničke komisije;
2. Usvajanje zapisnika 27., 28. i 29. sjednice Zajedničke komisije;
3. Razmatranje izvještaja Ministarstva odbrane BiH i Ministarstva sigurnosti BiH o učešću pripadnika Oružanih snaga BiH i policijskih službenika u operacijama podrške miru u 2005. s planom učešća u 2006.
(izvjestioci: ministri odbrane i sigurnosti);
4. Informacija Ministarstva odbrane BiH o potrebi intenziviranja komunikacije između institucija BiH i NATO-a, na znanje (predstavnik MOBiH);
5. Obavještenje o izdavanju građevinskih dozvola u graničnom pojasu po zaključku Zajedničke komisije (izvjestilac: ovlašteni predstavnik Ministarstva sigurnosti BiH);

6. Razmatranje Prijedloga orijentacionog radnog plana Zajedničke komisije za 2006.;
7. Tekuća pitanja.

Članovi Zajedničke komisije usvojili su jednoglasno predloženi dnevni red.

Ad. -1. Izbor drugog zamjenika predsjedavajućeg Zajedničke komisije

Boško Šiljegović obavijestio je prisutne da je Predstavnički dom, na 73. sjednici, umjesto Seade Palavrić izabrao Mehmeda Žilića za člana Zajedničke komisije, te je zato potrebno da ova komisija izabere i drugog zamjenika predsjedavajućeg umjesto Seade Palavrić. Sekretar Komisije, na molbu Šefika Džaferovića, koji zbog službenog puta nije mogao prisustvovati sjednici Komisije, informirala je da je Klub poslanika SDA predložio da se na ovu poziciju izabere Mehmed Žilić. Članovi Komisije jednoglasno su izabrali Mehmeda Žilića za drugog zamjenika predsjedavajućeg Komisije.

Ad. -2. Usvajanje zapisnika 27., 28. i 29. sjednice Zajedničke komisije

Članovi Komisije jednoglasno su usvojili zapisnike 27., 28. i 29. sjednice Zajedničke komisije.

Ad. - 3. Razmatranje izvještaja Ministarstva odbrane BiH i Ministarstva sigurnosti BiH o učešću pripadnika Oružanih snaga BiH i policijskih službenika u operacijama podrške miru 2005. s planom učešća u 2006. (izvjestioci: ministri odbrane i sigurnosti)

Boško Šiljegović dao je uvodne napomene vezane za Izvještaj Ministarstva odbrane BiH o učešću pripadnika Oružanih snaga BiH u operacijama podrške miru u 2005., s planom učešća u 2006., te Izvještaj Ministarstva sigurnosti BiH o učešću policijskih snaga u operacijama podrške miru u 2005. i Odluku Predsjedništva o učešću policijskih snaga BiH u operaciji podrška miru UN-a u Sudanu u 2006. Osvrnuo se na hronologiju dostavljanja pojedinih izvještaja, istaknuvši da je Izvještaj Ministarstva odbrane BiH dostavljen Parlamentarnoj skupštini BiH 11. 11. 2005. Tom prilikom, vođeni odredbama Zakona koji regulira ovu materiju, u komisijskoj fazi usvojena su dva zaključka. Naveo je da je zaključcima utvrđena potreba dostavljanja cjelokupnih izvještaja Vijeća ministara BiH i Predsjedništva BiH, koji se odnose ne samo na pripadnike Oružanih snaga BiH, već i policijske i druge službenike, ako takve aktivnosti postoje. Zato je i prolongirano razmatranje navedenog izvještaja. U međuvremenu je Ministarstvo sigurnosti BiH dostavilo Izvještaj, a Predsjedništvo BiH Zaključak o prihvatanju Izvještaja Ministarstva odbrane BiH i Odluku o učešću policijskih snaga BiH u operacijama podrške miru UN-a u Sudanu u 2006.

Slavko Marin naglasio je da je Predsjedništvo BiH, u skladu s odredbama Zakona, dostavilo u parlamentarnu proceduru Zaključak i pomenutu odluku za Sudan. Istaknuo je da bi u prvoj godini primjene pomenutog zakona trebalo imati razmišljanja zbog nesnalaženja institucija da u utvrđenim rokovima odgovore svojim obavezama. Osim toga, Predsjedništvo BiH nema dovoljno kapaciteta da dostavlja izvještaje koje svakako pripremaju resorna ministarstva. Zato su uz Izvještaj Ministarstva odbrane BiH donijeli zaključak kojim su prihvatili ovaj izvještaj, a u skladu s članom 4. navedenog zakona donijeli su Odluku za upućivanje policijskih snaga u Sudan. Dao je kratke napomene o aktuelnim misijama u okviru kojih je najopsežnija misija u Iraku.

Vesko Drljača istaknuo je da Izvještaj Ministarstva sigurnosti BiH sadrži statistički pregled završenih i misija koje su u toku. Trenutno, Bosna i Hercegovina je zainteresirana za misiju u Sudanu, koja pretpostavlja slanje dva policijska službenika. U toku njene realizacije usvojen je i Zakon. Ministarstvo je pravovremeno iniciralo učešće policijskih snaga u toj operaciji, ali se čekalo na Vijeće ministara BiH i Predsjedništvo BiH da se ova aktivnost zakonski završi, te Odluka Predsjedništva BiH uputi u parlamentarnu proceduru. Bosna i Hercegovina kao članica Ujedinjenih naroda ima obavezu da učestvuje u operacijama podrške miru kako bi bila prihvaćena kao ozbiljna, odgovorna i respektabilna država. Našoj zemlji su već u dva navrata produženi rokovi za donošenje odluke, ali je 4. april krajnji rok da ovu odluku potvrdi Parlamentarna skupština BiH. Zato se očekuje razumijevanje Parlamentarne skupštine BiH u poštivanju ovog roka. Konstatirao je potom činjenicu da Ujedinjene narode ne zanimaju naši zakoni, te su po njihovim propisima dali rok od 30 dana za aktivnosti potrebne za usvajanje odluke o učešću u mirovnim operacijama. Zato Ministarstvo inicira i izmjenu Zakona u pogledu skraćivanja roka u kojem Parlamentarna skupština BiH potvrđuje ovakve odluke.

Momčila Novakovića zanimalo je da li je Predsjedništvo BiH odobrilo produžetak misija navedenih u Izvještaju Ministarstva odbrane BiH, koje je podržalo zaključkom, te da li je od Vijeća ministara BiH zatraženo da da svoju ocjenu i odluči o nastavku misija u ovoj godini. Također, upitao je da li je Predsjedništvo BiH, prilikom donošenja Odluke o upućivanju policijskih snaga u Sudan, imalo na raspolaganju pripremljenu ocjenu Vijeća ministara BiH o opravdanosti razloga upućivanja koja uključuje sve zakonom utvrđene aspekte. Smatra da je potrebno da Komisija dobije ovu ocjenu što prije, kako bi se potom mogla izjasniti o operaciji u Sudanu u što kraćem roku, te je uputiti u daljnju parlamentarnu proceduru. Nakon toga saglasio bi se s prijedlogom da se ova odluka i izvještaj upute što prije u parlamentarnu proceduru o čemu treba izvijestiti kolegije oba doma.

Boško Šiljegović konstatirao je neophodnost upućivanja zahtjeva kolegijima domova radi ubrzanja procesa donošenja pomenute odluke.

Momčilo Novaković istaknuo je i činjenicu da smo preplavljeni novinskim člancima i slikama vojnika koji su učestvovali u mučenju zatvorenika u zatvorima u Iraku, te je pitao da li je bilo problema s ponašanjem pripadnika u našim jedinicama.

Slavko Marin nije se mogao izjasniti da li je od Vijeća ministara BiH zatraženo da ocijeni opravdanost nastavka mirovnih operacija, ali je obećao provjeriti ovo pitanje.

Halid Genjac konstatirao je da je Zakon objavljen 14.3.2005., te da je, po njegovom mišljenju, Parlamentarna skupština BiH bila dužna dva puta godišnje razmatrati izvještaje o operacijama podrške miru, a do kraja septembra tekuće godine donijeti odluku o nastavku aktivnosti za narednu godinu. Navedeni rokovi uveliko su prekoračeni. Zato se dostavljeni akti Vijeća ministara BiH i Predsjedništva BiH trebaju uputiti u parlamentarnu proceduru. Zanimalo ga je da li su dosadašnje misije nakon stupanja na snagu Zakona upućene Parlamentarnoj skupštini BiH na potvrdu, odnosno da li je takvih misija bilo uopće.

Vesko Drljača rekao je da je jedina nova mirovna misija koja se odnosi na policijske snage, pokrenuta poslije usvajanja Zakona, misija u Sudanu, a na ostale misije odnosi se produženje. Pripadnici policije koji su učestvovali u mirovnim misijama dobili su pohvale za svoj rad i ocijenjeni su kao kvalitetni. Jedinu primjedbu imao je na to da su policajci dolazili u različitim uniformama, te smatra da je potrebno da se ustanovi procedura za donošenje pravilnika o jednoobraznom odijevanju. U vezi s ocjenom opravdanosti učešća u misiji u Sudanu, koja sadrži sve potrebne aspekte, naveo je da je ona pravovremeno dostavljena Predsjedništvu BiH.

Momčila Novakovića zanimalo je da li je donesena odluka o slanju novog kontingenta pripadnika Oružanih snaga BiH u Irak. Ovo pitanje veoma je važno ako Komisija želi da se u ovoj godini u potpunosti pridržava Zakona.

Adem Huskić istaknuo je da ova komisija i Parlamentarna skupština nikad nisu kočili proces donošenja odluka. Potom je predložio zaključak kojim Komisija daje saglasnost dostavljenim aktima i upućuje ih u dalju proceduru. Drugi dio zaključka odnosio bi se na obavezu Zakonom utvrđenih institucija, da do kraja avgusta Komisiji dostave izvještaje za ovu godinu, sa predlogom plana aktivnosti za 2007. godinu.

Nikola Radovanović zamolio je da Služba ubuduće vodi računa o tome da predstavnici ministarstva budu zastupljeni na istom nivou. Istaknuo je da se kasnilo s izvještajem jer još nije bio utvrđen budžet. Što se tiče izvještavanja za tekuću i plana za 2007. godinu, založit će se da se dostave pravovremeno u parlamentarnu proceduru. U tom smislu Vijeće ministara BiH usvojilo je i zaključak da se naredni izvještaji Komisiji dostave do 1. marta tekuće godine. U odnosu na oslučivanje o dostavljenim aktima, istaknuo je da se u ovom slučaju razlikuju dvije vrste aktivnosti i to: upućivanje u misije i razmatranje opravdanosti učešća postojećih misija. Način njihove realizacije treba da bude usklađen u oba doma. Potom je predložio da Parlamentarna skupština BiH potvrdi opravdanost postojećih misija iz 2005., te donese odluku o nastavku učešća u 2006. Istaknuo je da je rok za donošenje odluke od 60 dana zaštitni rok i omogućava institucijama da ne odlučuju na brzinu, što je u interesu svih. Zato ne bi trebalo skraćivati ovaj rok. U vezi s jednoobraznošću uniformi pripadnika policije, smatra da Ujedinjeni narodi ne postavljaju takva pitanja ni uslove.

Vesko Drljača odgovorio je da Ujedinjeni narodi nisu ulazili u to, već su na to skrenuli pažnju naši predstavnici.

Ankica Tomić obavijestila je prisutne o proceduri vezanoj za mirovne misije. Sve inicijative do sada dolazile su iz Ujedinjenih naroda, koji nakon toga daju rok za odlučivanje od mjesec dana. Potom su se angažirala ministarstva Federacije BiH i Republike Srpske. Ministarstvo sigurnosti BiH je, 19.10. , predložilo Vijeću ministara BiH da od Predsjedništva BiH traži odobrenje. Krajnji rok koji su sada dali Bosni i Hercegovini je 4. april, nakon čega ne postoji šansa za učešće u ovoj misiji. Naglasila je probleme sa zakonskom procedurom donošenja odluka.

Momčilo Novaković ponovo je potencirao pitanje da li je bilo problema s ponašanjem naših pripadnika Oružanih snaga u Iraku, kako se ne bi našli u situaciji da ne budemo upoznati s eventualnim problemima.

Nikola Radovanović istaknuo je da po članu 16. Zakona postoji obaveza sastavljanja izvještaja o učešću pripadnika Oružanih snaga i policijskih službenika u operacijama podrške miru. Prema izvještaju koji su oni sačinili, pripadnici Oružanih snaga su dobili dobre ocjene. Obrazložio je da je priroda posla naših pripadnika u Iraku takva da nisu u kontaktu s Iračanima. Rekao je također da postoji mogućnost produženja mandata misije našim pripadnicima, zbog pozitivnih izvještaja. Naglasio je da misije postaju problematične kada pripadnici stanuju u privatnim kućama. Ako bi Ministarstvo odbrane BiH dobilo takve informacije, odmah bi ih prosljedilo Parlamentarnoj skupštini BiH.

Vesko Drljača informirao je da su pripadnici policijskih snaga do sada dobivali dobre ocjene od Ujedinjenih naroda. Njihov interni stav je da postoji problem s uniformama. Kako su pripadnici policije manje izloženi kontaktu jer obavljaju civilne poslove, nema navedenih problema s ponašanjem.

Christian Haupt istaknuo je da postoji potrebna ocjena opravdanosti uz Odluku za upućivanje pripadnika policije u Sudan, te da je trebalo dostaviti istovremeno s Odlukom. Zanimalo ga je da li Ministarstvo sigurnosti BiH može u ovakvim aktivnostima angažirati i pripadnike SIPE. Što se tiče jednoobraznosti policijskih unifomi, istaknuo je da je to marginalno pitanje i da ne predstavlja problem, jer čak i pripadnici policijskih snaga Njemačke nemaju iste uniforme. Konstatirao je da je izvršnoj vlasti potrebno šest mjeseci da završi proceduru i da je to problem.

Boško Šiljegović napomenuo je da je posjeta Ministarstvu sigurnosti BiH planirana u 13 i 30 sati, nakon sjednice, te se sva ova pitanja mogu postaviti tom prilikom.

Ankica Tomić naglasila je da SIPA nije popunjena adekvatnim kadrom koji zadovoljava postavljene uslove Ujedinjenih naroda. Ističe da su imali probleme pri izboru policijskih službenika. Oni su morali proći testiranja nakon kojih su bili odabrani.

Momčilo Novaković istaknuo je da ova komisija nije imala dovoljno podataka za donošenje odluke o mirovnoj misiji u Sudanu. Stoga je potrebno da se članovi Komisije što prije upoznaju sa materijalom koji obrazlaže potrebne aspekte, kako bi odluku mogli donijeti što prije, i kako bi se mogla uvrstiti u dnevni red sljedeće sjednice Predstavničkog doma.

Slavko Marin naglasio je da je Predsjedništvo imalo sve potrebne materijale za valjano odlučivanje, između ostalog, i ocjenu opravdanosti učešća, te da vjerovatno zbog nesnalaženja službe Predsjedništva BiH nije dostavljena. Naglasio je potom da će ovu ocjenu uz propratni dopis Predsjedništva BiH dostaviti najkasnije tokom sutrašnjeg dana, te zamolio Komisiju da donese potrebne odluke.

Članovi Komisije potom su jednoglasno usvojili sljedeće konstatacije:

- a) da ovo radno tijelo, kao i Parlamentarna skupština BiH u cjelini, nisu doveli do kašnjenja u procesu razmatranja i odlučivanja o navedenim aktima. Predstavnici predlagača navedenih akata istaknuli su činjenicu da se odredbe Zakona implementiraju prvi put, zbog čega je očito i došlo do nesnalaženja odgovornih institucija u njihovoj adekvatnoj primjeni. O dostavljenim aktima Parlamentarna skupština BiH treba se izjasniti u što kraćem roku, zbog evidentno velikog prekoračenja rokova, te da će tokom ove godine voditi računa da se utvrđeni rokovi izvještavanja i odlučivanja poštuju u potpunosti.
- b) da uz Odluku Predsjedništva BiH o upućivanju policijskih službenika BiH u operaciju podrške miru UN-a u Sudanu nije bila dostavljena potrebna dokumentirana ocjena opravdanosti učešća na osnovu koje se može donijeti odluka, a koja se odnosi na državni interes, postojanje vanjskopolitičkog aspekta, pravila angažiranja s jasnim ciljevima (pravni, sigurnosni i odbrambeni aspekt), te definiran finansijski aspekt. Predstavnik Predsjedništva BiH i predstavnici Vijeća ministara BiH naglasili su činjenicu da je ova obrazložena ocjena pravovremeno dostavljena Predsjedništvu BiH, čiji su je predstavnici, na zahtjev Zajedničke komisije, dostavili u parlamentarnu proceduru 16.2.2006.

Nakon usvajanja konstatacija, članovi Zajedničke komisije jednoglasno su predložili domovima Parlamentarne skupštine BiH da:

- a) se navedeni akti razmatraju istovremeno, u što kraćem roku, s prijedlogom za njihovo usvajanje (u skladu s članom 16. i 17. Zakona) ;
- b) u skladu s članom 17. Zakona, donesu odluku o opravdanosti i nivou nastavka učešća u postojećim operacijama podrške miru u 2006. pripadnika Oružanih snaga BiH, i to: u operaciji podrške miru „Iračka sloboda“ u Iraku /2 kontingenta po 36 pripadnika /, te u posmatračkim misijama u Etiopiji-Eritreji /9 pripadnika/ i DR Kongu /5 pripadnika/;
- c) u skladu s članom 6. Zakona, donesu odluku o potvrđivanju Odluke Predsjedništva BiH o učešću policijskih službenika u operaciji podrške miru UN-a u Sudanu / 2 pripadnika/ ;
- d) usvoje **zaključak** kojim Zajednička komisija i domovi zahtijevaju od svih institucija, čije su obaveze regulirane pomenutim zakonom, poštivanje jasno utvrđenih rokova vezanih za dostavljanje izvještaja i planova u parlamentarnu proceduru.

Ad. 4. Informacija Ministarstva odbrane BiH o potrebi intenziviranja komunikacije između institucija BiH i NATO-a - na znanje (predstavnik MOBiH);

Boško Šiljegović dao je uvodne napomene o Informaciji Ministarstva odbrane BiH o potrebi intenziviranja komunikacije između BiH i NATO-a, koja je Komisiji data na znanje. U Informaciji je istaknuta potreba imenovanja zamjenika umjesto postojećih neangažiranih članova Državne međuresorne komisije za PFP i NATO.

Nikola Radovanović istaknuo je da je od 1. januara ove godine promijenjena suština odnosa NATO-a prema BiH, jer je tada i Komisija za reformu odbrane prestala raditi. Saradnja s NATO-om sada se realizira preko njihovih ekspertnih timova, čija je procedura slična. Također je obavijestio da je realizirana i prva posjeta takvog tima i da će ova komisija o tome dobiti izvještaj. Prilikom te posjete naglašeno je da će sljedeći put posjetiti i druga ministarstva (sigurnosti, pravde, finansija i sl.), te kontaktirati sa Zajedničkom komisijom o kojoj imaju izuzetno pozitivno mišljenje. Zato je predmetnom informacijom i naglašen značaj koordinacionog tijela, tj. Državne međuresorne komisije koja treba biti što operativnija i efikasnija, kako bi BiH ispunila potrebne uslove na putu priključenja PFP-u, NATO-u i EU.

Momčila Novakovića zabrinjava činjenica da su članovi Državne međuresorne komisije neefikasni i da ne dolaze na sastanke zbog zauzetosti. Zato im odmah treba naći zamjenike. Predložio je da se donesu zaključci kojima bi se apeliralo na stvaranje neophodnih uslova za rad tog tijela i da ono od resornih ministarstava dobije svu potrebnu podršku.

Nikola Radovanović obrazložio je probleme u dosadašnjem radu tog tijela. Predsjedavajući ove komisije izabran je za ambasadora tako da nije mogao da učestvuje u radu. Također, kada je osnovana ova komisija, postojala je samo ideja za ulazak u Partnerstvo za mir. Sada, kad je u pitanju pridruživanje NATO-u, rad ove komisije postao je ozbiljniji.

Halid Genjac saglasan je s potrebom da Državna međuresorna komisija dobije na značaju. Zato je predložio zaključke kojima bi se od rukovodstva te komisije zatražilo da izvijesti u pisanoj formi, te da pred Zajedničkom komisijom podnese izvještaj o svom radu, probleme i način rada u narednom periodu. Ovom sastanku trebalo bi da prisustvuju i ministri odbrane i sigurnosti, koji bi također sa svog aspekta pripremili pitanja i probleme koje treba riješiti.

Nakon rasprave, jednoglasno su usvojeni sljedeći **zaključci**:

- „1. Zajednička komisija upoznata je s dostavljenom Informacijom o potrebi intenziviranja saradnje između institucija BiH i NATO-a;
2. Zajednička komisija naglašava značaj što efikasnijeg rada Državne međuresorne komisije za PFP i NATO i zahtijeva od svih institucija da pruže maksimalnu podršku kako bi se stvorili preduslovi za rad ovog tijela, te podržava prijedlog mjera za intenziviranje saradnje datih u Informaciji, posebno ističući mjeru koja se odnosi na obavezu Vijeća ministara BiH da izvrši hitnu zamjenu pojedinih članova Državne komisije;
3. Zajednička komisija će na neku od svojih narednih sjednica pozvati rukovodstvo Državne međuresorne komisije za PFP i NATO, kao i resorne ministre, kako bi dobila potpun pregled rada ovog tijela, te sagledala sve probleme čije je rješavanje neophodno za što lakši i brži ulazak BiH u PFP i NATO.“

Ad. 5. Obavještenje o izdavanju građevinskih dozvola u graničnom pojasu po zaključku

Zajedničke komisije (izvjestilac:ovlašteni predstavnik Ministarstva sigurnosti BiH);

Ismajil Sarić informirao je Zajedničku komisiju da Ministarstvo sigurnosti BiH nije iz dostavljenog zaključka Komisije znalo tačno na koje pitanje trebaju dati odgovor, te su se obratili Državnoj graničnoj službi BiH za dodatna saznanja. Odgovor iz Državne granične službe BiH bio je da ova služba ne zna da je bilo zabranjene gradnje u graničnom području. Smatra da je Komisija dostavila suviše uopćeno pitanje te je predložio da se ovo pitanje konkretnije definira..

Boško Šiljegović obrazložio je da se konkretan slučaj odnosio na granični prijelaz Ivanjica.

Željko Grubešić dao je detaljnije pojašnjenje postavljenog pitanja. Istaknuo je da je Komisija posjetila granični prijelaz Ivanjica i da su pipadnici Državne granične službe BiH tom prilikom iznijeli ovaj problem i tražili njegovo aktueliziranje. Prilikom navedene posjete bio je prisutan i predstavnik Ministarstva sigurnosti Miodrag Kundačina. Zato bi u okviru Ministarstva sigurnosti BiH trebalo biti malo više koordinacije, da bi u kontaktu s predstavnikom tog ministarstva imali više saznanja o konkretnom pitanju.

Mehmed Žilić smatra da je pitanje graničnog i međugraničnog pojasa složeno, pogotovo što još nije riješeno pitanje međudržavnih granica. Zato je neophodno riješiti sva neriješena pitanja u vezi s granicama sa Srbijom i Crnom Gorom , kao i s Hrvatskom.Tek onda bi se moglo pristupiti urbanističkom uređenju graničnog pojasa od 5 do 10 km, te rješavanju statusa imovine lica koja žive u tom pojasu. Ovo pitanje neophodno je odgovarajuće riješiti zakonskim definiranjem.

Ismajil Sarić naglasio je da postoji niz problema kod definiranja pojedinih graničnih prijelaza. Npr. granični prijelaz Ivanjica nije na istom mjestu za Bosnu i Hercegovinu i Hrvatsku. Pri tome je još i Općina Trebinje dostavila zahtjev da se granica pomjeri 2 km prema Trebinju, što, po njegovom mišljenju, nije razumno. Može se postaviti i pitanje drugih graničnih prijelaza. Smatra da je potrebno da se ova komisija konkretnije uključi u rješavanje pitanje granica.

Branko Zrno istaknuo je da Zajednička komisija može djelovati samo u formi komisijske inicijative te tražiti izvještavanje, a za detaljnije rješavanje ovog pitanja postoje ekspertske grupe i komisije. Prema njegovom mišljenju, navedeno pitanje je medijski mnogo eksploatirano i vezano je za rješavanje pitanja kategorije zemljišta uz granicu, interesa općina, a na kraju i interesa države da se ovo pitanje kvalitetno riješi. Posebno je istaknuo i pitanje zainteresiranosti stranih državljana koji žele kupiti zemljište u području graničnih prijelaza, a koje će vjerovatno puno više vrijediti kasnije. Zato je u rješavanje ovih pitanja neophodno uključivanje i Ministarstva unutrašnjih poslova, radi sprečavanja eventualnih nezakonitosti. Zatim je naglasio da je Zajednička komisija u okviru svoje nadležnosti obavljanja parlamentarnog nadzora posjetila dosta graničnih prijelaza, kako bi se neposredno uvjerila da li se odredbe zakona iz ove oblasti primjenjuju na odgovarajući način.

Željko Grubešić istaknuo je i činjenicu da je Zajednička komisija, nakon izvršenog nadzora na graničnom prijelazu Ivanjica i posjete terenskom uredu DGS-a koji pokriva ovaj granični prijelaz, zaključkom obavezala Ministarstvo sigurnosti BiH da organizira sastanak na kojem bi se razgovaralo o stanju na graničnim prijelazima.

Komisija je nakon rasprave jednoglasno usvojila **zaključak**:

1. „Zaključci Zajedničke komisije vezane za pitanje granica, poljoprivrednog i drugog kategoriranog zemljišta u graničnom pojasu dostavit će se Ministarstvu sigurnosti BiH i DGS-u. O navedenoj temi s ovim inistitucijama organizirat će se posebna tematska sjednica.“

Ad. 6. Razmatranje Prijedloga orijentacionog radnog plana Zajedničke komisije za 2006.;

Boško Šiljegović obavijestio je prisutne da je Služba uradila Prijedlog orijentacionog radnog plana Zajedničke komisije. U njemu su date aktivnosti koje slijede u 2006. U ovaj plan trebalo bi naknadno ugraditi i nove akte koji su navedeni dopisom Ministarstva sigurnosti BiH.

Nakon kraće rasprave članovi Zajedničke komisije jednoglasno su usvojili Orijentacioni radni plan za 2006., s dopunom. Ovaj plan bit će prosljeđen kolegijima domova radi izrade njihovog cjelokupnog Plana rada za 2006.

Ad. 7. Tekuća pitanja

a) Dogovor o posjeti Ministarstvu sigurnosti BiH

Boško Šiljegović obavijestio je prisutne da je Služba sastavila listu pitanja koja će biti postavljena prilikom posjete Ministarstvu sigurnosti BiH, a koja će uslijediti istog dana. Navedenu listu pitanja moguće je dopunjavati, mijenjati i sl.

Članovi Komisije su, nakon kraće rasprave, prihvatili predloženu listu pitanja koja će biti predana prilikom sastanka s predstavnicima Ministarstva sigurnosti BiH.

b) Imenovanje posmatrača u Upravni odbor i Izvršno tijelo Direkcije za restrukturiranje policije

Mehmed Žilić istaknuo je važnost uključivanja predstavnika Zajedničke komisije u Upravni odbor i Izvršno tijelo Direkcije za restrukturiranje policije, s obzirom na zadatke ovih tijela u predstojećoj reformi policije u BiH. Na ovaj način Komisija će imati pravovremeni uvid u cjelokupni proces reforme.

Halid Genjac saglasio se s mišljenjem prethodnika, te predložio gosp. Žilića za posmatrača.

Momčilo Novaković predložio je rukovodstvo Zajedničke komisije za posmatrače, jer će tako uvijek jedan od članova biti prisutan sjednicama Upravnog odbora i imati uvid u rad Izvršnog tijela, u slučaju da su drugi spriječeni.

Članovi Komisije jednoglasno su prihvatili prijedlog Momčila Novakovića i za posmatrače izabrali rukovodstvo Komisije.

c) Izvještaj o održanom sastanku u Ministarstvu odbrane BiH

Članovi Zajedničke komisije jednoglasno su prihvatili Izvještaj o sastanku u Ministarstvu odbrane BiH, održanom 24.1.2006.

d) Seminar o sigurnosnoj politici u Štokholmu-Švedska

S obzirom da je engleski jezik radni jezik seminara koji treba biti održan u Štokholmu, od 8. do 18. maja tekuće godine, ovom seminaru mogu prisustvovati samo članovi Zajedničke komisije sa znanjem tog jezika.

Boško Šiljegović predložio je da Halid Genjac prisustvuje ovom seminaru, što je jednoglasno prihvaćeno, s tim da će gosp. Genjac do kraja februara odlučiti da li će, zbog dužine tog seminara, putovati ili ne.

Adem Huskić iskoristio je ovu priliku da ukaže na činjenicu da tokom ove godine vjerovatno neće svi članovi Komisije moći putovati na sva predviđena putovanja. Zato je predložio da se napravi raspored odlazaka članova Komisije na pojedina putovanja, kako bi svi bili u prilici otići bar na jedno putovanje.

e) Informacija o sastanku s Taunom Aaltonenom iz Misije OSCE-a u BiH

Članovi Komisije primili su, bez primjedbi, k znanju Informaciju o sastanku predsjedavajućeg Zajedničke komisije s Taunom Aaltonenom, šefom Sekcije za izgradnju institucija i v.d. direktorom Odjela za sigurnosnu saradnju Misije OSCE-a u BiH.

Sekretar
Dragica Hinić

Predsjedavajući
Zajedničke komisije
Boško Šiljegović